



PARLIMEN MALAYSIA



RANG UNDANG-UNDANG
Lembaga Usaha Ikan Malaysia 1971
DR.90/1971

RANG UNDANG² LEMBAGA USAHA IKAN, 1971

SUSUNAN FASAL²

BAHAGIAN I

PERMULAAN

Fasal

1. Tajok ringkas, pemakaian dan mula berkuatkuasa.
2. Tafsiran.

BAHAGIAN II

LEMBAGA USAHA IKAN MALAYSIA

3. Memperbadankan Lembaga.
4. Tugas² Lembaga.
5. Pengurus Besar, pegawai dan penjawat Lembaga.
6. Kumpulanwang.
7. Meminjam wang.
8. Pelaboran.
9. Akaun dan Odit.
10. Laporan Tahunan.

BAHAGIAN III

AM

11. Kaedah².

JADUAL PERTAMA

JADUAL KEDUA

RANG UNDANG²

bernama

Suatu Akta bagi memperbadankan Lembaga Usaha Ikan Malaysia dan bagi membuat peruntukan² berkenaan dengan perkara² berhubung dengan-nya.

[]

MAKA INI-LAH DI-PERBUAT UNDANG² oleh Duli Yang Maha Mulia Seri Paduka Baginda Yang di-Pertuan Agong dengan nasihat dan persetujuan Dewan Negara dan Dewan Ra'ayat yang bersidang dalam Parlimen, dan dengan kuasa daripada-nya, saperti berikut :

BAHAGIAN I

PERMULAAN

1. (1) Akta ini boleh-lah di-namakan Akta Lembaga Usaha Ikan Malaysia, 1971.

Tajok ringkas, pemakaian dan mula berkuat-kuasa.

(2) Akta ini hendak-lah di-pakai di-seluruh Malaysia.

(3) Akta ini hendak-lah mula berkuatkuasa pada tarikh sa-bagaimana yang di-tetapkan oleh Menteri melalui pemberitahu dalam *Warta*, dan tarikh² yang berlainan boleh di-tetapkan bagi berlain-lain Negeri atau bahagian dalam Malaysia.

2. Dalam Akta ini, melainkan jika kandungan ayat-nya menghendaki makna yang lain—

Tafsiran.

“ahli” erti-nya mana² ahli Lembaga Usaha Ikan Malaysia termasuk Pengerusi, Pengerusi sementara dan mana² ahli sementara yang di-lantek di-bawah sekshen 3 (5);

“ikan” ada-lah termasuk apa² jenis ikan laut, ikan ayer payau atau ikan ayer tawar, kerang-kerangan, siput ayer, bunga karang, trepang dan lain² hidup-hidupan dalam ayer dan hasilan² daripada-nya, tetapi tidak termasuk penyu atau telur penyu;

“Kumpulanwang” erti-nya kumpulanwang yang di-tubuhkan di-bawah sekshen 6;

“Lembaga” erti-nya Lembaga Usaha Ikan Malaysia yang di-tubuhkan di-bawah sekshen 3;

“Menteri” erti-nya Menteri yang bertanggungjawab bagi perikanan;

“Pengerusi” erti-nya Pengerusi Lembaga Usaha Ikan Malaysia;

“Pengerusi sementara” erti-nya sa-saorang Pengerusi sementara Lembaga Usaha Ikan Malaysia yang di-lantek di-bawah sekshen 3 (5).

BAHAGIAN II

LEMBAGA USAHA IKAN MALAYSIA

Memper-
badankan
Lembaga.

3. (1) Maka ada-lah dengan ini di-tubuhkan suatu per-tubohan perbadanan bernama Lembaga Usaha Ikan Malay-sia (kemudian daripada ini di-sebut “Lembaga”) yang kekal turun temurun dan mempunyai suatu meteri dan boleh mendakwa dan di-dakwa atas nama-nya, dan, tertaklok kapada dan bagi maksud Akta ini, boleh membuat kontrek dan ada mempunyai kuasa bagi memperolehi dan memegang harta aleh atau harta takaleh dan bagi melepaskan-nya atau dengan sa-chara lain membuat apa² urusan mengenai-nya.

(2) Peruntukan² Jadual Pertama kapada Akta ini hendak-lah berkuatkuasa berkenaan dengan Lembaga.

(3) Lembaga hendak-lah terdiri daripada ahli² berikut yang di-lantek oleh Menteri—

(a) sa-orang Pengerusi;

(b) sa-orang Timbalan Pengerusi;

(c) sa-orang wakil Kementerian Pertanian dan Tanah;

(d) sa-orang wakil Perbendaharaan;

(e) sa-orang wakil Bahagian Perikanan Kementerian Pertanian dan Tanah;

(f) sa-orang wakil Lembaga Pemasaran Pertanian Per-sekutuan; dan

(g) tidak lebih daripada 5 orang yang berpengalaman dan telah menunjukkan kebolehan dalam perkara² berhubung dengan perusahaan perikanan atau pemasaran, kewangan atau pentadbiran.

(4) Apabila melantek orang² yang tersebut dalam perenggan (g) seksyen-kecil (3), Menteri hendak-lah memberi pertimbangan tentang perlu-nya berbagai kepentingan dan wilayah dalam Malaysia di-wakili.

(5) Sa-orang Pengerusi sementara atau sa-orang ahli sementara boleh di-lantek dalam masa Pengerusi atau ahli Lembaga tidak berupaya buat sementara (sama ada oleh sebab sakit atau tidak ada dalam Malaysia atau oleh apa² sebab lain), dan Pengerusi sementara atau ahli sementara itu hendak-lah di-lantek dengan chara sa-rupa seperti Pengerusi atau ahli di-lantek di-bawah seksyen ini.

(6) Sa-saorang ahli Lembaga hendak-lah memegang jawatan sa-lama tempoh yang di-nyatakan dalam surat-chara perlantekan-nya melainkan jika ia terlebih dahulu meletakkan jawatan-nya atau perlantekan-nya di-batalkan, dan ada-lah layak di-lantek sa-mula.

(7) Menteri boleh memberi kepada Lembaga arahan² sa-chara am yang tidak berlawanan dengan peruntukan² Akta ini tentang menjalankan tugas² dan kuasa² Lembaga.

4. (1) Tugas² Lembaga ia-lah untuk—

Tugas²
Lembaga.

(a) menggalak dan memajukan pengurusan yang cekap dan berkesan mengenai enterpris² perikanan;

(b) mengadakan dan menyelia kemudahan² kredit bagi pengeluaran ikan dan bagi memastikan supaya kemudahan² ini di-gunakan sa-penoh-nya; dan

(c) mengambil bahagian dalam enterpris² perikanan.

(2) Lembaga ada-lah berkuasa melakukan segala perkara yang menasabah perlu untuk atau bersampingan dengan menjalankan tugas²-nya di-bawah seksyen-kecil (1) dan khusus-nya—

(a) bagi menjalankan segala kegiatan yang pada pendapat-nya perlu, berfaedah atau sesuai untuk atau berhubung dengan menjalankan tugas²-nya termasuk kegiatan mengangkut, memindah, membungkus, memproses, menyimpan, memperingkat dan menjual ikan dengan lelong dan juga lain² chara pemasaran ikan am-nya, dan bagi menguruskan kegiatan² itu;

- (b) bagi menjalankan usaha menangkap ikan;
- (c) bagi menjalankan usaha untuk mendapatkan dan menjual perbekalan menangkap ikan dan juga kelengkapan dan barang² menangkap ikan;
- (d) dengan kelulusan Menteri dan persetujuan Menteri Kewangan, mengikat penyertaan ekuiti dalam apa² perusahaan menangkap ikan atau apa² perusahaan yang berniaga perbekalan dan kelengkapan menangkap ikan; dan
- (e) melakukan apa² perkara lain yang di-fikirkan patut oleh Lembaga untuk membolehkan ia menjalankan tugas² dan kuasa²-nya yang tersebut di-atas itu dengan berkesan.

(3) Dengan kelulusan Menteri dan persetujuan Menteri Kewangan, Lembaga boleh dari sa-masa ka-samasa menubuhkan suatu perbadanan dengan apa² nama yang di-fikirkan patut oleh Lembaga untuk menjalankan dan mengelola, melaksana serta menguruskan sa-suatu projek, ranchangan atau enterprais yang telah di-ranchang atau di-usahakan oleh Lembaga pada menjalankan tugas²-nya di-bawah sekshen ini; dan peruntukan² Jadual Kedua kapada Akta ini hendak-lah di-pakai bagi sa-suatu perbadanan yang di-tubuhkan di-bawah sekshen-kecil ini.

Pengurus
Besar,
pegawai
dan
penjawat
Lembaga.

5. (1) Timbalan Pengerusi Lembaga hendak-lah menjadi Pengurus Besar yang akan bertanggungjawab atas pentadbiran dan pengurusan hari ka-sahari hal ehwal Lembaga dan akan menjalankan apa² kewajipan dan kuasa sa-bagaimana yang di-amanah atau di-wakulkan oleh Lembaga atau Pengerusi apabila bertindak bagi pihak Lembaga.

(2) Lembaga boleh melantek pegawai dan penjawat mengikut sa-bagaimana yang di-fikirkan-nya perlu untuk menjalankan hal ehwal Lembaga dengan chekap.

(3) Pegawai dan penjawat Lembaga hendak-lah memegang jawatan sa-lama satu atau beberapa tempoh, menerima gaji dan elaun dan tertaklok kapada apa² syarat perkhidmatan mengikut sa-bagaimana yang di-tetapkan oleh Lembaga dengan kelulusan Menteri.

(4) Pengurus Besar, pegawai dan penjawat Lembaga hendak-lah di-sifatkan sa-bagai penjawat awam dalam erti Kanun Keseksaan yang berkuatkuasa di-Malaysia Barat atau dalam erti mana² undang² bertulis yang bersamaan dengan-nya yang berkuatkuasa di-Negeri Sabah dan Negeri Sarawak.

N.M.B.
Bab 45.
Sabah 3/59.
Sarawak
Bab 57.

6. (1) Bagi maksud Akta ini maka ada-lah dengan ini ditubuhkan suatu kumpulanwang (kemudian daripada ini di-sebut "Kumpulanwang") yang akan di-tadbir dan di-kawal oleh Lembaga—

Kumpulan-
wang.

(a) yang ka-dalam-nya akan di-masokkan—

- (i) apa² wang yang di-peruntokkan dari sa-masa ka-samasa oleh Parlimen;
- (ii) apa² wang yang di-dapati oleh Lembaga dalam menjalankan tugas²-nya di-bawah atau menurut peruntokan² Akta ini;
- (iii) apa² wang yang di-dapati atau terbit dari apa² kemajuan, pelaboran, gadaijanji, gadaian atau dibenchar yang di-perolehi oleh atau terletakhak pada Lembaga;
- (iv) wang yang di-pinjam oleh Lembaga bagi maksud menjelaskan apa² tanggongan-nya atau bagi maksud menjalankan apa² tugas-nya; dan
- (v) segala wang atau harta lain sama ada harta alah atau harta takalah yang mungkin dengan apa² chara kena di-bayar kepada atau terletakhak pada Lembaga;

(b) yang dari-nya akan di-bayar—

- (i) semua perbelanjaan (termasok perbelanjaan modal) yang di-lakukan oleh Lembaga pada menjalankan tugas² dan kuasa²-nya; dan
- (ii) wang bagi membayar balek apa² pinjaman yang telah di-beri kepada Lembaga menurut kuasa-nya untuk meminjam.

(2) Sa-belum permulaan bulan Jun tiap² satu tahun, Lembaga hendak-lah menghantar kepada Menteri suatu anggaran perbelanjaan (termasok perbelanjaan bagi projek² pembangunan) bagi tahun yang berikut-nya mengikut apa² bentok dan mengandongi apa² butir sa-bagaimana yang di-kehendaki oleh Menteri; dan Menteri hendak-lah sa-belum permulaan bulan November tahun itu memberi-tahu Lembaga jumlah wang yang di-benarkan bagi perbelanjaan am-nya atau jumlah² wang yang di-benarkan bagi tiap² satu jenis perbelanjaan.

(3) Lembaga boleh pada bila² masa menghantar kepada Menteri suatu anggaran tambahan bagi mana² satu tahun dan Menteri boleh membenarkan kesemua atau mana² bahagian perbelanjaan tambahan yang di-masokkan dalam anggaran tambahan itu.

- Meminjam wang.** 7. Lembaga boleh, mengikut syarat² yang di-luluskan oleh Menteri Kewangan, meminjam wang sa-banyak yang diperlukan oleh-nya bagi menjalankan sa-suatu tugas-nya.
- Pelaboran.** 8. Aset² Kumpulanwang, sa-takat mana yang tidak di-kehendaki untok di-belanjakan oleh Lembaga di-bawah Akta ini, hendak-lah di-laborkan mengikut chara yang di-luluskan oleh Menteri Kewangan.
- Akaun dan Odit.** 9. (1) Lembaga hendak-lah menyimpan dengan sa-patut-nya semua akaun dan rekod lain berkenaan dengan perjalanan-nya dan hendak-lah menyediakan penyata akaun bagi tiap² satu tahun kewangan.
- (2) Akaun² Lembaga hendak-lah di-odit oleh Juru Odit Negara atau juru odit lain yang di-lantek oleh Lembaga dengan kelulusan Menteri.
- (3) Sa-lepas berakhir tiap² satu tahun kewangan dan sa-lepas sahaja akaun² Lembaga di-odit, Lembaga hendak-lah mengarahkan supaya satu salinan penyata akaun itu mengikut chara sa-bagaimana di-kehendaki oleh Menteri di-hantar kepada Menteri, bersama dengan satu salinan apa² pandangan yang di-buat oleh Juru Odit Negara atau juru odit lain yang di-lantek di-bawah sekshen-kecil (2) mengenai mana² penyata atau mengenai akaun² Lembaga.
- (4) Menteri hendak-lah mengarahkan supaya satu salinan tiap² penyata dan pandangan itu di-bentangkan dalam tiap² satu Majlis Parlimen.
- Laporan Tahunan.** 10. Lembaga hendak-lah tidak lewat daripada 30 hari-bulan Jun tiap² satu tahun mengarahkan supaya di-buat dan di-hantar kepada Menteri suatu laporan berkenaan dengan kegiatan² Lembaga dalam masa tahun yang lalu dan mengandongi apa² maklumat berhubung dengan perjalanan dan dasar Lembaga sa-bagaimana yang di-kehendaki dari sa-masa ka-samasa oleh Menteri.

BAHAGIAN III

AM

- Kaedah².** 11. (1) Dengan kelulusan Menteri, Lembaga boleh dari sa-masa ka-samasa membuat kaedah² bagi maksud menjalankan peruntukan Akta ini.

(2) Khusus-nya dan dengan tidak menyentoh keluasan makna peruntokan yang di-atas, kaedah² itu boleh—

- (a) membuat peratoran bagi mengawal dan mengurus apa² bantuan (sama ada bantuan kewangan atau lain) yang mungkin di-beri kepada enterpris² menangkap ikan;
- (b) mengawal pemasaran dan pembahagian ikan yang di-punyaï oleh dan yang di-peruntokkan bagi Lembaga;
- (c) dengan kelulusan Menteri Kewangan, mengadakan peruntokan bagi menuboh dan menguruskan kumpulanwang simpanan bercharum bagi pegawai dan penjawat Lembaga, atau bagi membayar penchen, elaun atau ganjaran kepada pegawai dan penjawat tersebut apabila bersara atau apabila berhenti memegang jawatan sa-bagai pegawai dan penjawat Lembaga; dan
- (d) menetapkan apa² perkara yang di-kehendaki oleh Akta ini supaya di-tetapkan.

JADUAL PERTAMA

(Sekshen 3)

1. (1) Sa-saorang ahli Lembaga (lain daripada Pengerusi) hendak-lah mengosongkan jawatan-nya jika ia tidak menghadhiri meshuarat Lembaga tiga kali berturut² tanpa kebenaran bertulis dari Pengerusi.

(2) Ahli² Lembaga atau mana² daripada mereka mengikut sa-bagaimana yang di-tentukan oleh Menteri sa-lepas berunding dengan Menteri Kewangan hendak-lah di-bayar gaji, saraan atau elaun mengikut sa-bagaimana yang di-tetapkan oleh Lembaga.

2. Lembaga boleh mewakilkan mana² daripada kuasa-nya yang di-beri oleh Akta ini kepada mana² ahli atau pegawai-nya atau kepada mana² jawatankuasa yang di-lantek oleh-nya untuk menasihati atau membantunya pada melaksanakan tugas²-nya.

3. (1) Lembaga boleh melantek apa² jawatankuasa yang di-fikirkan-nya perlu bagi menguruskan apa² perkara berkenaan dengan tugas² Lembaga; dan tertaklok kepada perenggan-kechil (2) perenggan ini, jawatankuasa² itu hendak-lah terdiri daripada ahli² Lembaga yang di-lantek oleh Lembaga.

(2) Lembaga atau mana² jawatankuasa Lembaga boleh meminta sa-siapa jua (yang bukan ahli Lembaga) menghadhiri mana² meshuarat atau perbinchangan Lembaga atau jawatankuasa bagi maksud menasihatkan-nya atas apa² perkara yang di-binchangkan, tetapi sa-siapa yang hadir sa-demikian tidak berhak mengundi dalam meshuarat atau perbinchangan tersebut itu.

(3) Achara bagi mana² jawatankuasa yang di-lantek di-bawah perenggan-kechil (1) hendak-lah di-tetapkan oleh Lembaga.

4. (1) Koram bagi Lembaga ia-lah lima.

(2) Dalam semua meshuarat Lembaga, Pengerusi atau jika ia tidak hadir, Pengerusi sementara, atau jika kedua² Pengerusi dan Pengerusi sementara tidak hadir, sa-saorang ahli sa-bagaimana di-pilih oleh ahli² yang hadir, hendak-lah mempengerusikan meshuarat itu.

(3) Jika atas apa² soal yang hendak di-putuskan oleh Lembaga bilangan undi sama banyak-nya, Pengerusi atau Pengerusi sementara ada-lah berhak memberi undi pemutus.

(4) Tertaklok kapada perenggan-kecil (1), (2) dan (3), Lembaga hendak-lah menetapkan achara-nya sendiri.

5. (1) Lembaga hendak-lah mempunyai suatu meteri dan meteri itu boleh dari sa-masa ka-samasa di-pecahkan, di-tukar, di-ubah atau di-buat baharu sa-bagaimana yang di-fikirkan-nya patut:

Dengan syarat bahawa sa-hingga suatu meteri di-adakan di-bawah perenggan ini suatu chap yang mengandungi perkataan "MAJUIKAN MALAYSIA" boleh di-gunakan sa-bagai suatu meteri.

(2) Meteri Lembaga hendak-lah di-sahkan oleh Pengerusi dan sa-orang lagi ahli Lembaga, dan apa² suratan yang berupa sa-bagai di-meterikan dengan meteri tersebut dan di-sahkan seperti tersebut di-atas hendak-lah di-sifatkan sa-bagai telah di-sempurnakan dengan sah-nya sa-hingga akas-nya di-buktikan.

JADUAL KEDUA

(Sekshen 4)

1. Pada atau sa-belum tarikh sa-suatu perbadanan di-tubuhkan di-bawah sekshen 4, Lembaga hendak-lah membuat peratoran² berkenaan dengan perbadanan itu menyatakan—

(a) maksud dan tujuan perbadanan itu di-tubuhkan;

(b) hak, kuasa, kewajipan dan tugas² perbadanan itu;

(c) sistem pengurusan-nya; dan

(d) perhubungan antara perbadanan itu dengan Lembaga dan hak²-nya bagi mengawal perbadanan itu.

2. Tertaklok kapada peruntukan Akta ini, sa-suatu perbadanan ada-lah terikat kapada apa² peratoran yang telah di-buat di-bawah perenggan 1 berkenaan dengan perbadanan itu dan peratoran² itu hendak-lah berkuatkuasa bagi segala maksud sa-olah² ia telah di-buat di-bawah Akta ini.

3. Lembaga boleh pada bila² masa meminda, membatalkan atau menambah mana² peratoran yang di-buat di-bawah perenggan 1 berkenaan dengan sa-suatu perbadanan.

4. (1) Lembaga boleh mengarahkan supaya mana² perbadanan yang di-tubuhkan oleh-nya di-gulung dan di-bubarkan.

(2) Apabila sa-suatu perbadanan di-bubarkan di-bawah perenggan ini aset perbadanan itu hendak-lah di-pindahmilet dan di-letakhak pada Lembaga sa-lepas segala tanggongannya di-jelaskan.

(3) Penggulangan sa-suatu perbadanan di-bawah perenggan ini hendak-lah di-lakukan mengikut chara yang di-tetapkan oleh Lembaga.

5. Tiap² perbadanan yang di-tubuhkan di-bawah sekshen 4 hendak-lah menjadi suatu pertubohan perbadanan mengikut apa² nama yang di-beri kapada-nya oleh Lembaga dan hendak-lah kekal turun temurun dan mempunyai suatu meteri dan boleh mendakwa dan di-dakwa atas nama-nya itu, dan boleh membuat kontrek dan boleh memegang dan membuat apa² urusan mengenai apa² harta akeh atau harta takaleh dan boleh melakukan apa² perkara lain yang bersampingan atau berkenaan dengan sa-suatu pertubohan perbadanan dengan tidak berlawanan dengan peruntukan² Akta ini dan tertaklok kapada apa² sekatan atau had sa-bagaimana yang di-tetapkan bagi tiap² satu-nya oleh Lembaga.

6. (1) Tiap² perbadanan itu hendak-lah mempunyai suatu meteri, yang mengandongi sa-suatu tanda sa-bagaimana yang di-luluskan oleh perbadanan itu dengan persetujuan Lembaga, dan meteri itu boleh dari sa-masa ka-samasa di-pechahkan, di-tukar, di-ubah dan di-buat baharu oleh perbadanan itu, dengan persetujuan Lembaga sa-bagaimana yang di-fikirkan patut oleh perbadanan itu.

(2) Sa-hingga suatu meteri di-adakan oleh perbadanan di-bawah perenggan ini suatu chap yang mengandongi nama perbadanan itu boleh di-gunakan sa-bagai meteri.

(3) Meteri atau chap yang tersebut dalam perenggan-kecil (2) hendak-lah di-simpan dalam jagaan mana² orang yang di-arah oleh perbadanan dan hendak-lah di-sahkan oleh orang itu; dan semua surat-ikatan, suratan dan lain² suratchara yang berupa sa-bagai di-meterikan dengan meteri itu dan yang di-sahkan sa-bagaimana tersebut di-atas, hendak-lah di-sifatkan sa-bagai telah di-sempurnakan dengan sah-nya sa-hingga akas-nya di-buktikan:

Dengan syarat bahawa apa² suratan atau suratchara yang jika di-sempurnakan oleh sa-saorang yang bukan suatu pertubohan perbadanan tidak akan di-kehendaki di-chap dengan meteri, boleh di-sempurnakan oleh perbadanan itu dengan chara demikian itu juga; atau mana² suratan atau suratchara tersebut boleh di-sempurnakan bagi pihak perbadanan oleh mana² pegawai atau penjawat perbadanan yang di-berikuasa sa-chara am atau khas oleh perbadanan itu bagi maksud itu.

HURAIAN

Rang Undang² ini ada-lah bermaksud untuk menubuhkan Lembaga Usaha Ikan Malaysia dan bagi maksud itu mengadakan peruntukan² mengenai penyusunan, tugas, kewangan dan achara-nya.

Tugas² Lembaga ia-lah untuk menggalak dan memajukan pengurusan perusahaan perikanan, mengadakan dan menyelia kemudahan² kredit dan mengambil bahagian dalam enterprais perikanan (*Fasal 4*). Lembaga mempunyai kuasa² yang di-nyatakan dalam *Fasal 4* (2).

Suatu kumpulanwang ada-lah di-adakan bagi maksud Akta dan kumpulanwang itu di-tadbir serta di-kawal oleh Lembaga.

Lembaga boleh menubuhkan suatu perbadanan untuk berjalan dan menguruskan apa² projek, ranchangan atau enterprais (*Fasal 4* (3)) dan boleh melantek pegawai² dan penjawat² (*Fasal 5*). [P.N. (U²) 9.]

RANG UNDANG2 LEMBAGA USAHA IKAN MALAYSIA

Pindaan yang akan di-chadangkan dalam Jawatankuasa oleh

Y.B. Menteri Pertanian dan Tanah

- (i) Gantikan perkataan2 "LEMBAGA USAHA IKAN MALAYSIA" dengan perkataan2 "LEMBAGA KEMAJUAN IKAN MALAYSIA" di-mana terdapat di-dalam Rang Undang2.
- (ii) Jadual Pertama - Perenggan 5(1) -
Gantikan perkataan2 "MAJUIKAN MALAYSIA" dengan perkaraan2 "LEMBAGA KEMAJUAN IKAN MALAYSIA".

HURAIAN

Nama "Lembaga Kemajuan Ikan Malaysia" ada-lah di-fikirkan lebeh sesuai.

Jadual Pertama - Perenggan 5(1) - Meteri Lembaga dengan mengandongi perkataan "MAJUIKAN MALAYSIA" di-fikirkan tidak sechuchok dengan nama penoh "LEMBAGA KEMAJUAN IKAN MALAYSIA". Pindaan ini untuk menggunakan nama penoh Lembaga.